

14/01/1997

Usaha perangi gejala negatif diperhebat

KUALA LUMPUR, Isnin - Kerajaan akan memperhebat gerakan memerangi gejala punk dan budaya Barat yang negatif dengan memperkukuh institusi kekeluargaan, khususnya di kalangan masyarakat Islam.

Menteri di Jabatan Perdana Menteri, Datuk Dr Abdul Hamid Othman, berkata gejala punk dan budaya Barat lain yang mengancam golongan muda di negara ini banyak berlaku dalam rumah tangga yang porak-peranda.

Sehubungan itu, katanya, Jabatan Kemajuan Islam Malaysia akan mendekati mereka, khususnya ibu bapa yang bermasalah.

"Biasanya anak-anak yang mempunyai masalah atau rosak kerana ada masalah rumah tangga sama ada rumah tangga yang runtuh atau retak ataupun ibu bapa yang tidak menghiraukan anak-anak.

"Kita akan mendekati mereka dengan kerjasama Kementerian Pendidikan, terutama Persatuan Ibu Bapa dan Guru (PIBG)," katanya pada majlis berbuka puasa serta ramah mesra anjuran KFC Holdings (KFCH) dan Jakim, di Masjid Negara, petang ini.

Hadir sama Pengerusi Eksekutif KFCH, Datuk Mohd Sarit Yusoh.

Kelmarin, Datuk Seri Dr Mahathir Mohamad kesal dengan sikap sesetengah remaja yang meniru budaya Barat seperti punk dan skinhead serta menyifatkan mereka bodoh dan sombong kerana meniru budaya negatif yang merosakkan kehidupan.

Sehubungan itu, Perdana Menteri meminta rakyat menghapuskan perasaan rendah diri yang menyebabkan mereka meniru golongan yang dianggap lebih baik.

Dr Abdul Hamid berkata, cara hidup punk dilarang dalam Islam kerana ia bercanggah dengan nilai dan kehendak agama.

"Orang yang menghias diri begitu rupa salah dan tak betul dari segi Islam.

"Cara hidup berkumpul seperti itu juga salah dan bercanggah dengan nilai dan kehendak agama kita," katanya.

Menurutnya, budaya punk sama dengan hippies pada tahun 60-an yang perlu diperangi.

(END)